




ҚҰТТЫҚТАУ ЖЕДЕЛХАТЫН ЖОЛДАДЫ



Мемлекет басшысы Литва Президентіне құттықтау жеделхатын жолдады.

Қасым-Жомарт Тоқаев Гитанас Науседасы Литва мемлекеттілігін қалпына келтіру күнімен құттықтады. Жеделхатта Литва Республикасы бүгінде Еуропа Одағының белсенді мүшесі ретінде өз мемлекеттілігін нығайтып, азаматтарының әл-ауқатын жақсарту жолында едәуір жетістікке қол жеткізгені жазылған. Президент Қазақстан мен Литва арасындағы дәстүрлі достық пен өзара түсіністік рухында өрістеп келе жатқан қарым-қатынастар халықтарымыздың игілігі үшін ұдайы дами беретініне сенім білдірді.

БАРЛЫҚ САЛАДА ЗАҢНАМАНЫҢ САҚТАЛУЫ МАҢЫЗДЫ

Мемлекет басшысы Бас прокурор Берік Асылловты қабылдады. Президентке еліміздегі заң үстемдігінің жай-күйі және қадағалау органдарының басым бағыттары бойынша атқарған жұмыс қорытындылары туралы баяндалды.



Қасым-Жомарт Тоқаев криминалдық жағдай және қылмыстық-құқықтық саладағы азаматтардың конституциялық қақын қамтамасыз етуге бағытталған шаралар жөнінде есеп берілді. Прокуратура органдары сотқа дейінгі тергеу сатысында 32 мыңнан астам заңсыз шешімді тоқтатып, бұл істер Қылмыстық-процестік кодекске сай келмейді. 4 мың азаматтың қылмыстық іске негізсіз тартылуына жол бермеді. Сонымен қатар заңсыз ұсталған 1,5 мыңнан аса адам босатылды. Бас прокурордың қарсылығы негізінде Жоғарғы Сот 150 тұлғаға қатысты істің мән-жайын оң бағытқа өзгертіп, соның ішінде 10 адам толық ақталды. Берік Асылловтың хабарлауынша, әлеуметтік-экономикалық салада 81 мың кәсіпкердің, 979 мың зейнеткердің, халықтың әлеуметтік тұрғыдан аз қамтылған топтарының және басқа да азаматтардың бұзылған құқықтары қалпына келтірілген. 123 мың жұмысшының еңбек құқығын бұзуға жол берілмеген. Жалпы сомасы 4,5 миллиард теңге болатын алимент бойынша қарыз өндірілген. Президентке былтыр мемлекет пайдасына 627 миллиард теңгеден асатын өтемақы қайтарылғаны жөнінде айтылды. Экономикаға 12 триллион теңгеден астам қаржы құйған 800 инвесторға прокурорлық көмек берілді. Прокуратура актісі бойынша 136 лауазым-

ды тұлға жауапқа тартылды. Прокурорлар инвесторларға қатысты мемлекеттік органдардың 712 шешіміне келісім бермеді. Инвестициялық жобаларға қолдау көрсету барысында «прокурорлық сүзгіні» пайдалану өз тиімділігін көрсетті. Жалпыұлттық пулға енген жобалардың жүзеге асырылуын қадағалауға мүмкіндік беретін Цифрлы инвестициялық платформа белсенді қызмет атқарып келеді.

Мемлекет басшысына қоғам назарын аударған бірқатар қылмыстық істі тергеу барысы жөнінде мәлімет берілді.

Бас прокурор қылмысқа қарсы күресте цифрлық технологияларды жаппай енгізу жөнінде баяндалды. Атап айтқанда, іздеуде жүрген азаматтарды «ақылды» бейнекамераның көмегімен табу (іздеуде жүргендер саны 9,4 пайызға азайды) тәсілі жолға қойылды.

Қасым-Жомарт Тоқаев «Заң және тәртіп» қағидасын іске асыру, барлық салада заңнаманың сақталуын қамтамасыз ету жұмыстарын жалғастыруды тапсырды. Сондай-ақ алаяқтыққа қарсы іс-қимыл, есірткі бизнесімен күрес, қоғамдық орындарда құқықбұзушылықтың алдын алу бойынша құқық қорғау мен басқа да мемлекеттік органдардың қызметін үйлестірудің маңызын атап өтті.



ҮКІМЕТАРАЛЫҚ ЫҚПАЛДАСТЫҚ ӨРКЕНДЕП КЕЛЕДІ

Қасым-Жомарт Тоқаев Астанаға ресми сапармен келген Мажарстанның Сыртқы экономикалық байланыстар және сыртқы істер министрі Петер Сийяртомен кездесті.

Мемлекет басшысы дипломатка ілтипат білдіріп, Қазақстан мен Мажарстан арасындағы стратегиялық серіктестіктің деңгейі жоғары екенін атап өтті. Сондай-ақ жоғары деңгейдегі саяси диалогтің дәйекті дамып, үкіметаралық ықпалдастықтың белсенді өркендеп келе жатқанына назар аударды.

Президент былтыр Будапешт қаласына жасаған мемлекеттік сапары аясында қол қойылған келісімдердің өз деңгейінде іске асырылып жатқанына көңілі толатынын жеткізді. Қасым-Жомарт Тоқаевтың айтуынша, бұл уағдаластықтарды жүзеге асыру жан-жақты серіктестікті одан әрі тереңдетуге ықпал етеді. Мемлекет басшысы Мажарстан Премьер-министрі Виктор Орбанға ыстық ықыласын жолдады.

Өз кезегінде Петер Сийярто Қасым-Жомарт Тоқаевқа Мажарстан Премьер-министрінің сәле-

мін жеткізді. Мажарстанның Сыртқы істер министрі Астанаға сапары кезінде бұған дейін жоғары деңгейде қол жеткізілген уағдаластықтардың түрлі аспектілерін іске асыру жағдайын салалық министрліктермен және ведомстволармен талқылауының айтты.

Кездесуде екіжақты күн тәртібінің бірқатар өзекті мәселелері қарастырылды. Сондай-ақ сауда-экономикалық және инвестициялық салалардағы, энергетика және банк секторларындағы өзара тиімді байланысты кеңейтуге ерекше мән берілді.

Бұдан бөлек, Қасым-Жомарт Тоқаев пен Петер Сийярто халықаралық маңызды мәселелер бойынша пікір алмасты.

Кездесу соңында Президент Қасым-Жомарт Тоқаев қазақ-мажар қарым-қатынасын дамытуға қосқан үлесі үшін Петер Сийяртоны II дәрежелі «Достық» орденімен марапаттады.

РЕСМИ САПАРМЕН БАРАДЫ

Президент Қасым-Жомарт Тоқаев 18-19 ақпан күндері Король II Абдалла бен әл-Хусейннің шақыруымен Иордан Хашимит Корольдігіне ресми сапармен барады.

Сапар барысында сауда-экономикалық және мәдени-гуманитарлық салалардағы екіжақты ынтымақтастықты одан әрі дамытуға бағытталған жоғары деңгейдегі келіссөздер өтеді.

ТАҒАЙЫНДАУ

Мемлекет басшысының Жарлығымен Нұрымбет Аманұлы Сақтағанов Шығыс Қазақстан облысының әкімі лауазымына тағайындалды.

Мемлекет басшысының Жарлығымен Берік Уәли Абай облысының әкімі болып тағайындалды.

Мемлекет басшысының өкімімен Руслан Сұлтанұлы Желдібай Қазақстан Республикасы Президентінің кеңесшісі – Президенттің Баспасөз хатшысы лауазымына тағайындалды.

ТӘШКЕННЕН ЕМ ІЗДЕП ЖҮР ТАЛАЙ ҚАЗАҚ

Ташкенттегі емханадан шақыру жіберетін, шекарадан көлікпен күтіп алатын, пәтер тауып, дәрігерге кіргізетін «құтқарушылар» көбейген.



→ 5

ТАСҚЫН ҚАУПИ СЕЙІЛМЕЙ ТҰР

Атырау тасқын суға дайындалып жатыр. Екінші жыл қатарынан күтіліп отырған тасқынның көлемі биыл былтырғыдан да ауқымды болады деген болжам бар.



→ 7

БАЛУАНДАРДЫҢ ЖЕТІСТІГІН ЖОҒАРЫ БАҒАЛАДЫ

Мемлекет басшысы Халықаралық үлес федерациясының президенті Ненад Лаловичті қабылдады.



Қасым-Жомарт Тоқаев күрестің халықаралық спорт аренасындағы еліміздің беделін нығайтуда айтарлықтай рөлге ие екенін айтты. Сонымен қатар әлемдік турнирлерде табысты өнер көрсетіп жүрген отандық балуандардың жетістіктерін жоғары бағалады.

Мемлекет басшысы Қазақстанның Халықаралық үлес федерациясымен стратегиялық ынтымақтастықты одан әрі арттыруға ниетті екенін мәлімдеді. Қасым-Жомарт Тоқаевтың айтуынша, инфрақұрылымды жетілдіру, даярлықтың озық әдістерін енгізу және елімізде халықаралық турнирлерді өткізу осы спорт түрінің танымалдылығы мен бәсекеге қабілеттілігін еселеуге ықпал етеді.

Ненад Лалович қонақжайлық танытқаны үшін Қасым-Жомарт Тоқаевқа ризашылығын білдіріп,

ықпалдастықты жалғастыруға дайын екенін жеткізді. Ол Қазақстанды федерацияның маңызды серіктесі деп атап өтіп, біздің ұлттық күрес мектебінің зор табыстарына тоқталды. Ненад Лаловичтің айтуынша, қазақстандықтардың дені сау ұлт қалыптастыруға ұмтылысы спорт пен басқа да салаларда жоғары нәтижеге қол жеткізуге септігін тигізеді.

Кездесуде Қазақстанның әлемдік спорт қоғамдастығындағы беделін нығайту және басымдыққа ие спорт түрі ретінде күресті одан әрі ілгерілету перспективасы талқыланды.

Кездесу соңында Мемлекет басшысы Қазақстандағы күресті дамытуға қосқан үлесі үшін Халықаралық үлес федерациясының президенті Ненад Лаловичті «Достық» орденімен марапаттады.

18 АҚПАН 2025 | СЕЙСЕНБІ



ПАЛАТА ОТЫРЫСЫНЫҢ КҮН ТӘРТІБІН БЕКІТТІ

Сенат Спикері Мәулен Әшімбаевтың төрағалығымен палата бюросының отырысы өтті. Онда депутаттар 20 ақпанда болатын Сенат отырысының күн тәртібін бекітті.

Алдағы бейсенбіде өтетін Сенат отырысында палата депутаттары «Қазақстан Республикасының Үкіметі мен Түркия Республикасының Үкіметі арасындағы өсімдіктер карантині және оларды қорғау саласындағы ынтымақтастық туралы келісімді ратификациялау туралы» заңды қарайды.

Заңның мақсаты — фитосанитариялық қауіпсіздікті қамтамасыз ету және екі мемлекеттің аумағында карантиндік зиянды организмдердің әкелінуі

мен таралуын болғызу үшін өсімдіктер карантині және оларды қорғау саласындағы екіжақты ынтымақтастықты дамыту.

Келісімнің күші фитосанитариялық шаралар тұрғысынан, әсіресе халықаралық тасымалдау жағдайларында зиянкестер үшін жасырыну орны бола алатын немесе олардың таралуын жеңілдететін кез келген өсімдікті, өсімдік өнімін, жинау орнын, қаптаманы, тасымалдауды, контейнерді, топырақты және кез келген басқа организмді, объектіні немесе материалды қоса алғанда, карантинге жатқызылған барлық материалға қолданылады.

Сонымен қатар бюро отырысында депутаттар Сенаттың іс-шаралар жоспарын іске асыру аясындағы міндеттерді талқылады және бұған дейін Парламент Мәжілісі қабылдаған заңдарды жұмыс үшін палата комитеттеріне бөліп берді.

ЖӘРДЕМАҚЫ КӨБЕЙДІ

2025 жылғы қаңтар айында көпбалалы отбасыларға және наградталған аналарға берілетін мемлекеттік жәрдемақымен 846 мың отбасы жалпы сомасы 49,5 млрд теңге мөлшерінде қамтылған. Оның ішінде көпбалалы отбасыларға берілетін жәрдемақы 604,7 мың отбасыға 43 млрд теңге мөлшерінде, наградталған анаға берілетін жәрдемақы 241,8 мың адамға 6,5 млрд теңге мөлшерінде төленген.



Көпбалалы отбасына берілетін мемлекеттік жәрдемақыға 4 және одан да көп бірге тұратын кәмелетке толмаған немесе 23 жасқа дейінгі күндізгі бөлімде оқитын студент балалары бар отбасылар табысына қарамастан үміткер бола алады.

Төлем мөлшері бала санына қарай есептеліп төленеді. Наградталған анаға берілетін жәрдемақы «Алтын алқа», «Күміс алқа» алқаларымен наградталған немесе бұрын «Батыр ана» атағын алған, I және II дәрежелі «Ана данқы» ордендерімен наградталған аналарға тағайындалады.

Наградталған анаға берілетін жәрдемақы мөлшері:

- «Күміс алқа» алқасымен наградталған аналарға — 6,40 АЕК немесе 25 165 теңге;
- «Алтын алқа» алқасымен наградталған немесе бұрын «Батыр Ана» атағын алған, I және II дәрежелі «Ана данқы» ордендерімен наградталған аналарға — 7,40 АЕК немесе 29 097 теңге.

2025 жылғы I қаңтардан бастап көпбалалы отбасыларға тағайындалатын мемлекеттік жәрдемақылардың мөлшері 6,5%-ға артқан.

ЗЕЙНЕТТІ КҮННІҢ КЕПІЛІ – БОЛМАСЫН БЮДЖЕТ ТЕТІГІ



Үкімет экономиканың тұрақты дамуына негіз болады деген мақсатта инфрақұрылымды жаңғырту үшін қаржыландырудың жаңа жолдарын іздеуде. Соның ішінде сарапшылар арасында ең көп талқыланатын құралдың бірі – Бірыңғай жинақтаушы зейнетақы қорының (БЖЗК) активтерін пайдалану. Қоғамда халықтың зейнетақы жинақтарын мемлекеттің пайдалануына қатысты түрлі алаңдаушылық бар. Сондықтан БЖЗК активтерінің инфрақұрылымдық жобаларға бағытталуының себептері, тәуекелдері мен тиімділігі туралы саралауды жөн санадық.

Кәмила ДҮЙСЕН

ҰБ монетарлық операциялары департамент директоры Н.Тұрсынханов Сенатта зейнетақы активтерін басқарудың тиімділігін талқылау барысында еліміздің мемлекеттік бағалы қағаздары отандық бағалы қағаздар нарығындағы неғұрлым сенімді және өтімді қаржы құралдары екенін атап өткен еді. Оның айтуынша, БЖЗК-ның зейнетақы активтерін жергілікті нарыққа инвести-

циялау тұрақты инвестициялық табыс алуды ғана көздемейді, сонымен қатар елдің әлеуметтік-экономикалық дамуына да ықпал етеді.

— 2025 жылы жергілікті нарықта мемлекеттік бағалы қағаздарды, квазимемлекеттік сектор субъектілерінің, екінші деңгейдегі банктердің және басқа да бағыттардың облигацияларын сатып алу сияқты бағыттар шеңберінде БЖЗК зейнетақы активтерін нарықтық жағдайларда инвестициялау жалғастырылатын болады. Зейнетақы активтерін

инвестициялау тек нарықтық мөлшерлемелер бойынша жүзеге асырылатынын атап өту маңызды. Мысалы, 2025 жылғы I қаңтардағы жағдай бойынша валюта портфелінің көлемі 17,2 млрд АҚШ долларын (9 трлн теңге) немесе зейнетақы активтерінің шамамен 40%-ын құрады. Бұл инвестициялар географиясын және қаржы құралдарының тізбесін кеңейту есебінен БЖЗК зейнетақы активтерінің портфелін әртараптандыруды қамтамасыз етеді. Сондай-ақ ұзақмерзімді кезеңде инвестициялық портфельдің сапасы мен кірістілігін арттыруға мүмкіндік береді, — дейді ол.

Валюта портфелінің бір бөлігі стратегиялық түрде әртүрлі қаржы құралына инвестицияланады әрі алдын ала белгіленген стратегияға сәйкес жүзеге асырылады. Әдетте валюта портфелінің активтерін басқару арнайы индекс негізінде жүргізіледі. Индекс — бұл таңдалған инвестициялық нарықтардағы бағалы қағаздардың кең жиынтығы. Мысалы, акциялар индексіне

Apple, Microsoft, Tesla және басқа да ірі компаниялардың 1 000-нан астам эмитенті кіреді. Эмитент — бұл бағалы қағаздарды шығаратын және олар бойынша міндеттемелерді өз мойнына алатын компания, ұйым немесе мемлекет. Мұндай тәсіл инвестициялардың әртараптандырылуын қамтамасыз етіп, тәуекелдерді төмендетуге мүмкіндік береді.

Тұрсынхановтың мәлімдеуінше, 2024 жылдың қорытындысы бойынша БЖЗК зейнетақы активтерінің кірістілігі 8,6% инфляция кезінде 17,8%-ды құрады. Сонымен қатар БЖЗК зейнетақы активтерінің көлемі 2024 жылы 26% -ға, ал валютаның үлесі 40%-ға дейін өскен. Айта кетейік, 2025 жылдың I қаңтарында зейнетақы активтері 22,4 трлн теңгеге жетті, бұл былтырғы жылмен салыстырғанда 4,6 трлн теңгеге артық. 2016 жылдан бастап зейнетақы портфеліндегі валюта активтерінің үлесі 17%-дан 40%-ға дейін ұлғайған.

Ресми деректерге сүйенсек, БЖЗК активтерінің шамамен 70%-ы қазақстандық эмитенттерге салынған, олардың ішіндегі ең бастысы мемлекеттік борыш (Қаржы министрлігінің облигациялары) және квазимемлекеттік борыш (ұлттық компаниялар мен холдингтердің борыштық міндеттемелері) болып табылады. Басқаша айтқанда, Қазақстанның зейнетақы жүйесі мен болашақ төлемдер ел экономикасының табысына тікелей байланысты.

Бір қарағанда ел қаржысы халық игілігіне жұмсалғаны — құптарлық іс. Дегенмен қаржыгер Андрей Чеботаревтің пікірінше, мұндай қадамнан келер қауіп те жоқ емес. Оның негізгі ойы — зейнетақы қоры активтері — «ең қасиетті» ақша, сондықтан оларды кез келген мемлекеттік жобаларға жұмсауға болмайды, тек сенімді инвестицияларға бағыттау керек. Қаржыгер зейнетақы активтерінің максималды қорғалған және тиімді болуы тиіс деп санайды.

— Қазақстандағы инвестициялық мүмкіндіктердің шектеулі екенін және сенімділігі жоғары қаржы құралдары-

ның аздығын ескере отырып, бұл қаражаттарды шетелдік, неғұрлым тұрақты және сенімді активтерге салу керек. Патриотизмге емес, кірістілікке және қауіпсіздікке басымдық беру қажет. Мысалы, Норвегияның зейнетақы қоры өз активтерінің 5%-ын ғана ел ішінде ұстайды, себебі елдегі дағдарыс бүкіл қордың құлауына әкелуі мүмкін. Қазақстандық зейнетақы активтері де осы қағидамен әртараптандырылуы керек, — деді ол.

Сарапшы елдегі кейбір зейнетақы активтерінің өтімділігі төмен екенін алға тартты. Яғни, белгілі бір бағалы қағаздарды қажет болған жағдайда тез әрі тиімді сату мүмкін емес. Бұл дағдарыс кезінде үлкен проблемаға айналуы мүмкін. Қаржыгер мұны жылжымайтын мүлікпен салыстыра келе, құнды қағаздар да қағаз жүзінде жоғары бағалануы мүмкін, бірақ оларды тез сату қажет болғанда, бағасы күрт төмендейтінін айтты.

— Зейнетақы қорының активтері Қазақстан экономикасына инвестиция ретінде емес, халықтың болашақ зейнетақысын қамтамасыз ететін қауіпсіз, сенімді қаржы құралы ретінде қарастырылуы керек. Зейнетақының инвестициялаудың қазақстандық моделі негізінен ішкі нарыққа бағдарланған, ал норвегиялық, чилилік және аляскалық модельдер кірістілікті арттыру үшін жаһандық қаржы құралдарын белсенді пайдаланады. Өкінішке қарай, әртараптандырудың болмауы және зейнетақы қорының кірістілігінің төмендеуі зейнетақы жүйесі (AFP) қаражатты халықаралық нарықтар мен жеке секторды қоса алғанда, әртараптандырылған активтерге салады.

